

Futbola

FERNANDEZEK GORAIPATU EGIN DU TALDEA, «BAINA GOL AUKERAK SARTU EGIN BEHAR DIRA»

«Oraindik badugu zer hobetu»

Luis Fernandez etsita azaldu zen atzo Lezaman, Madrildik iritsi ondoren eman zuen prentsaurrekoan. Berak badaki Athleticek partidu ederra egin zuela igandean Bernabeun. Hala ere, frantziarra irabazle hutsa da eta ez dago gustora bere taldea galtzaile izan zelako.

Ramon Basaldua / Bilbo

ASPALDIKO urteetako partidurik ederrena egin zuen igandean Athleticen Chamartinen. Zuri-gorrien joko onak, oster, ez zuen islarik izan markagailuan. «Dezepzionatuta nago, jokalariek egin zuten lana ikusita emaitza hobea merezi zutelako. Real Madridero entrenatzaileak berak ere aitortu zuen moduan punturen bat merezi genuen. Gauza ona izango zen guretzat. Edozein kasutan, bestelako ondorio batzuk atera behar dira atzoko partidutik. Saikapeneko lideraren aurka jokatu genuen eta ekipoak ezin hobeto erantzun zuen», azaldu zuen atzo Luis Fernandezek.

Athleticek izan zuen, bai, gol aukerarik Real Madridero atezainaren aurrean. Hala ere, zuri-gorriak ez ziren aurkariaren atea zulatzeke gauza izan. Taldeak ederto jokatu zuela azpimarratu arren, Luis Fernandezek onartu egin zuen Athletic ez zela fin ibili Illgnerren ate aurrean.

«Ea lesionaturik daudenak osatzen diren» • Real Madridek arazo ugari izan zuen Juanjo Valenciaren ate ingurura hurbiltzeko. Fernandezek mutiak ondo kokatuta zeuden zelaian eta ederto geratu zituzten Fabio Ca-



Luis Fernandezek dio hurrengo lau partidurak «erabakigarriak» izango direla.

MIKEL MARTINEZ

pelloren taldeko izar nagusiak. Izan ere, aurtengo Liga Txapelketan 23 gol sartu dituzten Suker eta Mijatovic ezinean aritu ziren partidu guztian zehar. «Taldeak asko hobetu du Liga hasi zenetik. Real Madriden aurkako partidurak berretsi egin ditu orain arte erakutsi ditugun gauza onak.

Hala ere, oraindik ere badugu zer hobetu», zioen atzo Athleticeko entrenatzaileak gol egiteko arazoak aipatuz. Edozein kasutan, Luis Fernandezek ez zuen Joseba Etxeberriari buruz ezer esan nahi izan. «Jokalariek errespetua merezi dute eta ez dut inor aipatuko. Edozelan ere, ea lesionaturik

dauden joalariak osatzen diren, taldearen onerako izango da eta».

Athleticek ez du garaipenik lortu 14. jardunaldian Barceonari irabazi zionetik. Luis Fernandezek arabera, datozen lau partidurak erabakigarriak izango dira taldeak denboraldi honetan zer egingo duen ikusteko.

Aldaketak Koparako

ATHLETICEKO jokalariek ez dute denbora askorik izango bihar iluntzean Villarrealen jokatu duten Kopako partidua prestatzeko. Eguerdi aldera iritsi ziren atzo zuri-gorriak Lezamara, eta bezperan jokatu ez zuten gizonak izan ezik, gainerakoek ez zuten ia ezer egin. Honenbestez, Luis Fernandezek gaurko entrenamenduan prestatu beharko du prestatu beharrekoa. Zuri-gorrien entrenatzaileak iragarri duenez, Ligan jokatzeko aukera handirik izan ez duten gizonak izango dira nagusi Villarrealen aurkako partidurako deialdian. Hala ere, aldaketa ugari izango dira hasierako hamaikakoan. «Liga, txapelketa oso gogorra da eta asko geratzen zaigu lasaitasuna eskuratzeko. Ligak garrantzi handia dauka guretzat eta saikapenean gauden lekuan egonda, ezin dugu esan urtea amaitu dela Athleticentzat. Aurrera eta atzera begiratzeko moduan gaude. Gainera, igandean Celtaren aurka jokatu dugun partidua zaila izango da oso», azaldu zuen atzo Fernandezek.

Eduardo Estibariz, Juanjo Valencia, Imanol Etxeberria, Genar Andrinua, Corino, Oscar Vales, Goikoetxea, Bolo eta Mikel Cortina biharko partidurako deialdian izango direla ziurtatu zuen atzo entrenatzaileak, Estibarizek hasieratik joka dezakeela gaineratuz. Esan beharra dago Mikel Cortina erdilaria estreinakoz izango dela denboraldi honetan Athleticen deialdi batean Eibar taldeetik etorri ondoren. X

Darko Kovacevicek ordu erdia jokatu du gaur Hernanin Girondinsen kontra

Mildek eta Craioveanuk larunbatean jokatu ahal izango dute Tenerifen

E. Esnaola / Donostia

REALA-GIRONDINS adiskidantza partidu jokatu da gaur 18:00etan (ETB1, 20:00) Hernanin (Gipuzkoa), herri horretako taldearen urrezko ezteiak direla eta. 50. urteurrena duela lau urte bete zituen Hernanin, baina gauza bat dela bestea dela, Realaren eta Bordeleko Girondinsen arteko neurketa gaur arte atzeratu da. Azkenean, behintzat, lortu dute arduradunek neurketa hau antolatzea, eta hori da garrantzitsuen. Frantziako Ligan laugarren doan Girondins (Papin da izarra) ekartzea 35.000 libera kostatu zaizkie (ia milioi bat pezetak). Sarreraren prezioak honako hauek izango dira: taldeko bazkide ez direnek 2.000 pezeta ordaindu beharko dituzte partidua harmailetan ikustegatik, eta bazkideek 1.500; bestela, bazkide ez direnek 1.500, eta bazkideek 1.000; umeen prezioa, 500 pezetakoa.

Gaurko neurketa adiskidantza partidu baldin bada ere, Real-

rentzat baliagarria izango da. Batik bat, Darko Kovacevic aurrelari serbiarrarentzat. Kovacevic meniskioan ebakuntza egin zioten iragan abenduaren 20an, eta herenegungo Real-Zaragozarako prest zegoen itxura izan arren, Javier Iruretagoiena Irureta entrenatzaileak nahiago izan zuen serbiarra ez sartzea deialdian. Gaur Kovacevicek Hernanin ordu erdia jokatu zuela esan zuen larunbatean Iruretak, eta atzo berretsi egin zuen esandakoa. Ez dirudi arazorik izango duenik Realeko jokalariek, azkeneko entrenamenduetan ondo moldatu baita. Ezusterik gertatu ezean, larunbat honetan Tenerifen (20:30, ETB1) jokatzeko moduan izango da.

Ligako partidu horretarako prest izango diren beste bi jokari Hakan Mild eta Gica Craioveanu dira. Mildi sarrera gogor samarra egin zion igandean Belsuek, eta Realeko suediarri hiru puntu eman behar izan zizkioten. Mildek atzo Goteborgera joan behar izan zuen, kontu per-

tsional bat konpontzera. Gaur bertan itzuliko da Donostiara, baina ez da izango Hernanin. Bihar aztertuko diote zehatz-zehatz hanka, eta orduan argituko da Teneriferen zelaian jokatzeko gauza izango den ala ez. Ziurrenik, ez du arazorik izango jokatzeko. Gica Craioveanu errumaniarra ere min hartuta dago; sudurrean, hain zuzen ere. Atzo arratsaldean medikuekin egon zen, eta agian gaur Hernanin jokatu eta dena egingo du. Ez badu jokatzeko, bihar normal entrenatuko da.

Gaur ziurrenik Juan Gomez ez da Hernanin izango. Giharrak nahiko kargatuta dauzka, eta baliteke Iruretak atsedena ematea. Realeko entrenatzaileak ohi-koak ez direnak ipiniko ditu hasieratik Girondinsen kontra, eta titularren bat ere izango da hamaikakoan. Imanol eta Luis Perez gero eta hobeto daude, eta atzoko entrenamenduko partidu txikian parte hartu zuten; hala ere, ez daude oraindik jokatzeko moduan. X



Xabier Gracia eta Gustavo Poyet lehian, Real-Zaragoza partiduko une batean. Gracia izan zen neurketako golegile bakarra.

ANTONIO ALONSO / EFE